

Meeqquerivinni pikkorissunik sulisoqalernissaq anguniarlugu qanoq iliorluta perorsaasutut ilinniarnernup sulinissallu pilerinarnerulernissaa pillugu apeqquteqaat allaavigalugu oqallinnissamik siunnersuut.

(Inatsisartuni ilaasortaq Nivi Olsen, Demokraatit)

Akissuteqaat

(Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq)

Nunatsinni perorsaasutut ilinniarnissap sulinissallu pilerinarnerulernissaanut qanoq iliorsinnaanerput pillugu apeqquteqaat aallaavigalugu oqallittoqarnissaanut Inatsisartuni ilaasortaq Nivi Olsen Demokraatineersoq siunnersuuteqarmat Naalakkersuisut qujapput. Aallarniutigalugu oqallinnissaq pingaaruteqartorujussuummat Naalakkersuisut siunnersuuteqartumut isumaqataapput.

Perorsaasunik amigaateqarneq inuiaqatigiinni ajornartorsiutaammat siunnersuuteqartup aallaavigaa. Perorsaasutut piukkunnaatilinnik sulisunik ilinniartitsinissaq, sulisussarsiortarnissaq sulisullu suliffimmini suliinnarnissaat annerusumik pingaartittariaqarput. Inuiaqatigiit siunissami perorsaasunik imminnut pilersortariaqarput, massakkullu pissutsit pisariaqartippaat piffissami aalajangersimasumi perorsaasunik amerlanernik ilinniartitsinissarput ulluunerani paaqqinnittarfinnut naammattunik sulisussaqarnissaq qulakkeerniarlugu. Naalakkersuisut isummamut tassunga isumaqataapput.

Nunatsinni agguaqatigiissillugu perorsaasut 29-t Perorsaanermik Ilinniarnik illoqarfillu qimannagu perorsaasutut ilinniarnernit aqqutigalugit ilinniakkaminnik naammassinnittarput. Naalakkersuisut taamatut perorsaasunik ilinniartitsinerup perorsaasunik amigaateqarnermut iluaqutaavallaannginnera ilisimavaat.

Perorsaasutut ilinniarnissamut qinnuteqartut amerlissappata ilinniarnertuunngorniarfik aqqutigalugu ilinniagallit amerlanerit pisariaqartinneqarput. Tamannalu anguneqassappat perorsaasunik amigaateqarneq aatsaat illoqarfinni perorsaasutut ilinniarnernit aqqutigalugit amerlanerit ilinniartinnerisigut pisinnaavoq.

Ilaatigut sulisut perorsaanermik suliallit amerlanerit suliassanik isumaginnissallutik pisinnaasallit pigilernissaat siunertaralugu Naalakkersuisut inunnik isumaginninnerup iluani ilinniarnissanut 16,2 mio. kr.-it 2018-imit immikkoortissimavaat. Taakkununga ilanngullugit perorsaasunut diplomitalimmik ilinniarneq aamma immikkut perorsaanermut illoqarfik qimannagu perorsaasutut ilinniarneq taaneqarsinnaapput.

Inunnik isumaginninnerup iluani ilinniarnernut suliniutinik pisariaqartitsineq paasiniaaffiginiarlugu 2018-imi oktobari 'Isumaginninnermut suliassa qarfimmi ilinniartitaanikkut suliniutinut tunngasut' sammisaralugu suleqatigiissitamik pilersitsisoqarpoq, sulinerlu 2018-imi oktobarimi aallartinneqarluni. Suleqatigiissitap

ilinniarnert pioreersut nutaallu, ilinniaqqittarnert pikkorissartitsisarnerrillu misissuiffigissavai, suliniutillu ataasiakkaat ataqatigiissaariffigalugit nalilersorlugillu.

Tamakkulu pissutigalugit perorsaasutut sulisunik piukkunnaatilinnik sulisoqalernissaq annerusumik anguniartariaqarmat Naalakkersuisut isumaqatigaat, siunissarlu ungasinnerusooq eqqarsaatigalugu perorsaasut amerlanerujussuit ilinniagaqalernissaat anguniartariaqarluni, aamma sulisunik ilinniarsimasunik amigaateqarneq matuniarlugu kiisalu ulluunerani paaqqinnittarfinni pitsaassuseq suliamillu ilisimasaqarneq kivitsiffiginarlugit.

Siunnersuuteqartullu perorsaasut akissarsiatigut atugarisaat perorsaasunik amigaateqarnermut tunngavilersuutigai, tassalu perorsaasut akissarsiaat suliffissanut allanut sanilliullugit orniginarpallaanngimmata, tamannalumi inuusuttut ilinniakkamik aallartitserusunnginnerannut pissutaaqataasinnaalluni.

Naalakkersuisut erseqqissaatigissavaat Naalakkersuisut "Ulluunerani paaqqinnittarfinni sulisunut periusissatut iliuusissatullu Pilersaarutaanni" perorsaasut akissarsiaasa allanik sulialinnut sanilliussilluni misissuiffigineqarnissaannik aallartitsisimmamata.

Taamaalillunilu akissarsianut kisitsisitigut paasissutissanik suliaqartoqassaaq, suliamilu ilinniagartuunut assigiinngitsunut akissarsiaritinneqartut - soorlu perorsaasunut, peqqissaasunut, ilinniartitsisunut, atualernissamat piareersarfinni ilinniartitsisunut isumaginninnermullu siunnersortinut - aallartinnermi akissarsianut, suliunnaarnermi akissarsianut agguaqatigiissillugulu akissarsianut agguataarlugit takuneqarsinnaassapput. Perorsaasunut tunngatillugu ulluunerani paaqqinnittarfinni aamma ulloq unnuarlu paaqqinnittarfinni perorsaasunut agguataarlugit.

Taamatut Naalakkersuisut oqaaseqarlutik Inatsisartuni oqallittoqarluarnissaa kissaatigaat.